

KISA CHA KUUMBA.

Kisa cha kuumba kilianza pale Allah alipomuumba baba yetu Adam -Amani iwe juu yake- pale alipomuumba kwa udongo, kisha akaupulizia roho, na kumfundisha majina ya vitu vyote, na akawaamrisha Malaika wamsujudie, ikiwa ni kumkirimu na kumtukuza zaidi, wakamsujudia wote isipokuwa Iblisi alifanya kiburi na kukataa kwa kumfanyia hasadi Adam, Mwenyezi Mungu akamshusha kutoka mbimbuni na kumtoa hali ya kuwa dhalili na myonge, na akamhukumia kumlaani na maisha mabaya na moto.

Hakika Iblis aliomba kwa mola wake mlezi amsubirisha mpaka siku ya kiama, akamkubalia, na akaapa kuwa atahakikisha anawapotosha wana wa Adamu wote, na kuwaondoa kwenye njia iliyo sahihi (Uislam). Kisha baada ya hapo Allah akamuumba mkewe Hawaa, ili apate utulivu na kilewazo kwake, na akawaamrisha wakae peponi, ambamo kuna kila aina ya neema, isiyopata kuhisiwa na mtu yeyote hapa duniani. Na Allah akawaeleza juu ya uadui wa Iblisi kwao, na akawakataza wasile mti Fulani ulio humo peponi, kama kuwajaribu na kuwapa mtihani, lakini Shetani akawatia ushawishi na kuwapambia kuula mti ule, na akaapa kwao kuwa yeye ni mshauri mzuri, na akawaambia; (ikiwa mtakula mti huu mtakuwa ni wenye kuishi milele).

Basi hakuacha kuwashawishi mpaka akafaulu kuwapotosha, wakala tunda la ule mti na kumuasi Allah mlezi wao. Na walipoligundua hilo walijuta sana kwa tendo lao hilo, na wakatubia kwa mola wao mlezi, na mola wao akawakubalia toba yao. Lakini aliwashusha kutoka peponi na kuwaweka ardhini, na akaishi Adam na mkewe Hawaa Ardhini, na wakajaaliwa kizazi ambacho kiliongezeka kwa wingi mpaka kufikia hii leo.

Na bado Iblis na kizazi chake wanendeleza vita dhidi ya wanadamu, ili wawazuie kufuata uongofu, na kuwanyima kheri, na kuwapambia shari, na kuwaweka mbali na yale anayoyaridhia Allah, ikiwa ni pupa yake ya kutaka kuwaingiza motoni siku ya mwisho (Kiama).

Lakini Allah mtukufu hakuwaacha viumbe wake hivi hivi, bali aliwatumia Mitume ambao wanawabainishia haki, na kuwaelekeza kwenye yale yenye ufaulu kwao.

Alipokufa Adam kizazi chake kiliishi baadae kwa muda wa karne kumi, hali ya kuwa wao wanamtii Allah na kumpwekesha, kisha ukatokea ushirikina, na akaabudiwa asiyekuwa Allah pamoja na Allah, watu wakaanza kuabudu masanamu, hapo Allah akatuma Mtume wake wa kwanza ambae ni nabii Nuhu – Amani iwe juu yake- akiwaita (kuwalingania) watu kumuabudu Allah peke yake na kuacha kuabudu Masanamu.

Kisha ikafululiza Mitume baada ya Nabii Nuhu, wakiwaita watu kwenye kuufuata Uislam, ambao ni kumuabudu Allah peke yake na kuacha kuabudu chochote kinyume na yeye.

Kisha akaja Nabii Ibrahim –Amani iwe juu yake- akawalingania watu wake kuacha kuabudu masanamu, na wamwabudu Allah pekee.

Na utume baada ya Nabii Ibrahim ni kwa watoto wake Ismaili, Is-haka, kisha kizazi cha Is-haka.

Na katika Mitume wakubwa katika kizazi cha Is-haka ni Yakobo, Yusufu, Musa, Daudi, Suleimani na Issa- Amani iwe juu yao-. Na baada ya Issa hapakuwa na mtume aliyetokana na kizazi cha Is-haka.

Baada ya hapo utume ulielekea kwa kizazi cha Ismail, pale alipomchagua Allah mtukufu Muhammad – Amani iwe juu yake- awe Nabii na mtume wa mwisho, na ujumbe wake ndio wa mwisho, na kitabu chake ndicho cha mwisho, ambacho ni Qur-an, ujumbe wa mwisho kwa mwanadamu kutoka kwa Allah.

Na ndio maana ujumbe wake umeenea, umekamilika, ni kwa watu wote na majini, kwa waarabu na wasio waarabu, ni wenye kufanya kazi zama zote, sehemu yeyote na jamii yeyote, na kwa hali zote, hakuna kheri isipokuwa umeielekeza, wala shari isipokuwa umeitahadharisha.

Na Allah hatamkubalia mtu yeyote kufuata dini yeyote isipokuwa dini aliyokuja nayo mtume Muhammad –Rehema na amani za Allah ziwe juu yake-.